

նելու: Թեթեւ նախաճաշիկից յետոյ Ասլանը վեր առեց իր հետ զանազան տեսակ բժշկական դեղեր ու գործիքներ, մի մասն էլ ինձ տոռեց, եւ մենք դուրս եկանք տնից: Նա ասաց, որ մի քանի հիւանդների այցելութիւն պիտի գործէ: Քաղաքում դեղատուն չլիներու համար, նա ումն որ բժշկում էր, դեղերն էլ ինքն էր տալիս, աղքատներին՝ ձրի, իսկ հարուստներից փող էր ստանում:

— Դու գիտե՞ս քո դերը, Ֆարիատ, — ասաց նա, երբ դուրս եկանք փողոցը:

— Ի՞նչ դեր, — հարցրի ես, բոլորովին մոռացած լինելով այն պատուերները, որ, Վան քաղաքը մոտնելուց առաջ, ճանապարհին տոռել էր ինձ:

— Դու եւրոպացի բժշկի ճանապարհորդութեան առաջնորդն ես: Հասկացա՞ր:

— Հասկացայ, — մեքենայաբար պատասխանեցի ես:

Ի՞նչ առաջնորդ կարող էի լինել ես, երբ ոչ երկրի հետ ծանօթ էի եւ ոչ լեզուներ գիտէի: Ես, իսկապէս, նրա խուլ ստոռն էի, որ անգիտակցաբար զնում էի նրա ետեւից:

Ասլանը սիրում էր ոտքով ման գալ, որքան եւ հեռու լիներ ճանապարհը: Նա հագած ուներ միսչեւ ծնկները երկայն կօշիկներ, գլխին դրել էր մոխրագոյն, լայնեզր, փափուկ գլխարկ, իսկ աչքերը զինոած էին մուգ-ծխագոյն ակնոցներով, որոնք բոլորովին անտեսանելի էին կացուցանում նրա թափանցիկ, խորախորհուրդ աչքերը, որոնք ակնոցների ամենեւին պէտք չունէին: Թեւքի տակ կրում էր իր դեղորայքի պայուսակը, ձեռքին բռնած ուներ մի հաստ փայտ, որ աւելի մահակ էր, քան թէ գաւազան:

Արեւը դեռ նոր էր բարձրացել: Ամառնային առաւօտը մի առանձին զովութիւն էր ստացել Այգեստանի լայն փողոցների մէջ, որոնք աջ եւ ձախ կողմից զարդարոած էին ահագին ուռենիների եւ բարդենիների շարքերով: Այդ դարեւոր ծառերով հովանաւորոած էին փոքրիկ առռակները, որոնք հոսում էին փողոցների երկու կողմերից եւս եւ ջուր էին մատակարարում թէ այգիներին եւ թէ բնակիչների տները շրջապատող պարտեզներին: Նայելով այդ ծառազարդ բնակարաններին, անծանօթ մարդու գլխում իսկոյն ծագում է այդ միտքը, թէ որքա՞ն ուրախ եւ խաղաղ ապրում է այստեղ քաղաքացին:

— Հայը ապրել գիտէ, — ասում էր Ասլանը, — ստրկութեան լծի տակ անգամ նա պահպանում է մի տեսակ բարեկեցութիւն, եւ դրա մէջն է նրա կենդանականութիւնը, որ դարերի ընթացքում թէեւ տրորւում է ճնշման ներքոյ, բայց դարձեալ չէ մեռնում: